

閩中荔支通譜

閩中荔支通譜卷十一

溫陵黃履明立訂

綏城吳師古啓信校

明鄧道協荔支譜三

文類

洪離傳

王褒

洪離字成林蜀人也鼻祖側生顯於漢厥後種落散處閩中爲盛離生而形狀特異鵠首鶴頂牛心虎皮爲人華而實確而質內含章美津津

可尚以故識與不識咸稱譽之唐天寶間天子  
聞其名采而致之使者冠蓋交於道猶慮其來  
之緩也特設驛傳以迎焉旣至同盆成子虛水  
候上謁時盛暑上坐沉香亭趣而入上笑曰聞  
卿之名有年矣卿來能啓沃朕心乎離從容稽  
首曰臣遠方賤士也自謂深根固蒂山林間足  
矣叨以先容獲薦左右然臣起遐陬酸寒鄙陋  
恐見罪不敢忝居喉舌之位上撫再四曰名不  
虛也特命釋褐肌膚潔白上曰玉色英英照人

中何物也離垂首對曰特一赤心報陛下耳上大悅錫爵紅陽侯奉朝請賜予數召對無虛日後宮貴人邀而食之開懷款會適其意而後已久之執法大臣謂離弗能裨益治體何往來屑屑之不憚煩也請罷之上用其言由是疏焉後終於蜀孫支入閩奕葉繁衍遂爲巨族有一派而居嶺南皆未若閩之大著耳

### 江妃傳

謝肇淛

江妃者唐玄宗皇帝侍妃也小名綠玉其先世

家於南越漢武帝時有側生女隨尉陀入貢帝  
見其美愛幸之爲築離宮居歲餘無子寵衰聞  
陳夫人以相如賦復幸亦奉金鍾千求相如作  
賦賦上不見省卒幽死長門中然家世產好女  
子不乏和帝時詔歲貢采女以備掖庭後用唐  
元言罷之妃以開元中生母方姪時夢繁星疊  
纍從天下已取吞之覺而命筮得離之頤曰銜  
珠黃鵠生芻一束去其國三歲不復是女也而  
艷必大吾宗果以季夏之望生妃及長有殊色

肌理膩白如玉無少疵齟體有異香好製紅繒  
爲襦慙縠若粟裊以碧衫豐膚內映益增其妍  
然常自匿翠幄中市里罕見其面也時天下承  
平日久上怠於政務日事遊宴貴妃楊氏寵冠  
椒房而妃有姊采蘋先入宮得侍帝從容言其  
女弟鮮姣欲以傾貴妃帝聞心動而先時左丞  
相張九齡又盛稱妃之美不容口遂遣中使乘  
傳遽召妃促者絡繹於道以天寶五載六月下  
旬得幸於華清宮中霞綃初卸玉肪瑩發妖冶

融液香聞遠近旣而丁香輕含火齊徐吐流腴  
浹籍簪舄遺落不自收舉帝大悅翼日制曰朕  
味道渴賢采華茹實博羅筐筥之媛以佐蘋藻  
之聲蓋有年矣才人江氏德惟邁種姿擅凝脂  
國色天香沁吳宮之芬水冰心雪質奪漢掌之  
金莖政當破瓜之年益重標梅之感今遣大將  
軍高力士持節冊封淑妃位貴妃次於戲玉食  
萬方予豈有愛於喉舌小星三五爾益自固其  
衾裯食哉以時無廢朕命自是寵遇日隆每食

未嘗不侍側然妃小有智數時時以甘言自媚  
於貴妃浸入肺腑得其驩心貴妃不嫉也一日  
上與貴妃交膝坐沉香亭擁妃於側裸戲久之  
謂貴妃曰此郭舍人所謂嘜喋女脣甘如飴者  
耶時安祿山在傍曰臣以爲滑膩渾如塞上酥  
耳上與貴妃大笑時方盛暑上有消渴疾道士  
羅公遠以術致江陵柑百顆西京州進蒲萄數  
百斛上謂左右曰爭如我江家並帶瓊漿風味  
乎然妃終逼於貴妃不自安常以顏色非故求



自疎遠每歲僅一再見上上嬖益渥併賜采蘋  
號梅妃寵與貴妃埒三人各自矜其色宮人或  
微問帝帝曰江家妃神仙中人也楊梅尚不堪  
作奴耶貴妃采蘋聞之大怒以事掎摭妃暴烈  
日中又加炮烙曰使老嫗黥面聞者傷之後左  
拾遺杜甫紫微舍人杜牧忠州刺史白居易皆  
有詩弔妃妃旣死竄其族於閩廣間然子孫猶  
美麗稱江家種以比昭君村云

外史曰諺有之美男破唇美女被舌江氏起卉

服見天子恩寵傾苑籞盛矣而卒以色衰來殘  
桃之譖况其他乎然貴妃投繯馬嵬梅氏碎骨  
兵燹血汙遊魂跡穢青史而妃之香名猶膾炙  
人口本支蕃衍亦天道哉余懼世之人不察猥  
云色舉與楊梅二氏同類而共笑之也

荔卦

徐勣

離利貞亨自求口實

彖曰離也者明也柔在內而剛得中止而麗乎  
明中正以觀天下離之時義大矣哉

象曰木上有火離君子以果行育德

初九天地變化草木蕃

象曰草木蕃品物咸亨也

六二黃離元吉

象曰黃離元吉中未變也

九三資于丘園美在其中

象曰資于丘園其文蔚也美在其中惟其時物

也

九四以宮人寵用拯馬壯若號一握爲笑

象曰以宮人寵尚口乃窮也用拯馬壯積中不  
敗也一握爲笑內喜之也

六五公用享于天子大車以載吉

象曰公用享于天子承天寵也大車以載中以  
爲實也

上九碩果不食有殞自天

象曰碩果不食何可久也有殞自天承虛筐也

荔子編序

王世貞

承甫遊河洛所著作輒爲人梓行其遊楚亦然

而最後訪其友顧益卿於閩閩既饒佳山水其  
海錯珍苞之類又足以佐酒而益卿居恒推事  
承甫氣益發舒歌詩益富前後得詩近三百首  
名之曰荔子編范宮允伯楨胡侍御原荆期傳  
之而屬序於予夫荔最先著蜀品最下次著嶺  
品小勝閩最後著品最高遂以其味居天下冠  
承甫之所遊閩者豈爲荔子故耶其所爲歌詩  
豈盡發之荔子耶今承甫之所咏荔子百不得  
一而其所遊閩則以閩之山水足賞而益卿足

修也顧名編而以荔子母亦承甫有所托謂其  
後出而能冠天下之味也耶余覽承甫詩一再  
過真若所謂絳繻綃單玉膚冰液望而以爲海  
山仙人者吾不知視三危之瑞露何若要不在  
中山紫花西域蒲萄下矣雖然以之植上林寧  
能側生雜選於霜露摧剝之餘而媚時口哉承  
甫休矣其卽吾南中安矣

石倉園荔支閣記

曹學佺

荔支閣介于雙樹樹固有垣繚之而枝葉扶疎

特出垣外作虬龍勢競舞而飲水閣去其梯借  
徑于菴之別室以梯以橋皆因于樹樹有欹側  
處人行蹲而避之坐露臺如在綠幄中荔子熟  
時朱實離離可掇而食不煩假手于攀摘矣閣  
之後闢有一池泉冷甚種荷不能活湛然青玉  
色有亭臨之曰玉泉亭  
爲坡以種菊  
曰菊坡

荔支園草題辭

李維楨

荔支惟蜀粵閩有之而閩爲最閩又以莆爲最  
其色香味殊絕見於前人詩賦者讀之令人口  
津津恨不縮地坐樹下飽嘗之莆人戴幼孤一  
日介其友謁余示以荔支園草有詩有尺牘有  
舉子義蓋家有荔支園日諷誦著述其中余三  
復之艷色奪目清香逆鼻甘味沁齒卽啖生荔  
支不啻如是望梅止渴豈虛語哉白香山謂荔  
支離本枝一日色變二日香變三日味變四五



日外香色味盡去此草越千里如比肩歷千歲  
如旦暮耳豈草木之實所堪擬議然而雲壑布  
衣類杜工部所云可爲嘅嘆物之遇合有時安  
知不有包匭底貢十里一置五里一堠爲扶荔  
宮而居之壓枝天子釘坐真人舉天下無雙者  
余識其端竊比斷林之券云

大泌山房集

荔支亭稿序

郭子章

予守潮郡齋隙圃故有荔支亭予延友人康用  
光爲兒輩師講業亭下用光自潮還豫章自豫

章入潮往來有感抒之乎詩一日解其囊於亭  
下示予骨神稜爽音響玲瓏采光陸離枝葉扶  
疎絲貞元大曆而上遡於建安黃始亡不擘鏡  
而融結之用光家在古瑞山下與珠林劉尚書  
相距尋尺尚書故以詩雄元明間用光自以  
病蠲舉子業日夕步趨故其詞遠宗魏唐而近  
範珠林子卒業之忻然有當予心也時維夏五  
荔子正丹紫羅觀殼白璧填瓢綳縹裁葉醴酪  
和漿而龍鱗干霄芬香襲庭鶴巢其巔鹿螭其

根予孰眎之又忻然有當予心也予朗吟用光  
詩提如意舞鹿鳴鶴和恍若有解惠風時暘荔  
子垂垂如紺珠火齊飄然欲聲因題之曰荔支  
亭稿嗟乎荔生五嶺八閩九真之間處炎野華  
赤海不得與五柞玉樹並植宜春樂遊諸苑而  
歲時放丹不改柯易色用光與予共席三顧雙  
鳳下才十倍予而予邀天幸通時籍用光猶然  
衡門布衣不受人憐無幾微不堪之狀又何以  
異嶺外之荔彌迭彌丹乎雖然漢破南越自交

州移植起扶荔官貯之則又惡知無好用光者  
如漢故事植之承明金馬門而用光當斯時所  
以對公車獻天子者不爲上林甘泉之賦則  
必有痛哭流涕長太息之策不爲明堂之圖封  
禪之書則必有正心誠意之對

區區荔子詞鄧  
林一枝焉耳

### 荔支攷序

王世懋

陳右伯玉叔蔡駕部伯華皆予執友也而皆官  
於閩伯華謫爲鹽官時居閩最久啖生荔支弗  
嫌爲之說而貶之比來典試再賦香椽感誇其

美欲令班荔支上伯華書一通遺予予時欲爲  
荔支解嘲冗弗暇賦丙戌春予來自莆玉叔授  
一編曰荔支攷前後徵荔支事博極羣書略無  
挂漏余听然而笑敬謝陳先生足下幸甚爲側  
生吐氣遂令王生賦不得作夫毀譽愛憎之口  
所從來遠矣我非彼彼亦非我兩吻相角不若  
造而問長年三老何則彼所徵者衆也故羊棗  
偏好於魯點羊棗不以其故永譽荔支專惡於  
伯華荔支不以其故損聲假令予賦而相角彼

亦且羊棗我耳玉叔不自爲政膾炙哉將不爲  
天下月旦乎蓋予始嘗火山於漳幾謂荔支橫  
得名耳稍入夏於泉啖桂林便謂爲佳六月居  
莆飽啖狀元香風味品絕七月還福更啖長樂  
勝畫甘釀倍之火山見今攷中而桂林狀元香  
勝畫皆今人名不載蔡君謨譜豈卽當時陳紫  
頰而異其名耶玉叔謂吾子當併序之爲吾是  
書增價聊復及此昔米元章辨顛於蘇長公長  
公戲曰吾從衆倘伯華瞑目而爭子請以是謔

對

荔支考序

陳文燭

余入閩啖生荔支而甘焉謂百果之品此爲第一可消文園之渴者司馬相如上林賦云荅選荔支豈所指卽漢苑中所種二百餘株耶嗣是唐伯游上書止交州貢仲長統言人主當思神芝朱草而鄙其患荔支之腐都非長卿本旨漢而後珍之者衆矣暇取蔡君謨譜益以往籍屬文學王子林子校焉知味者共之若云梨橘各

有其美食蕉漸入于佳而與荔支較焉非余所知也作荔支考梓藏嘉樹軒

荔支舊譜序

屠本峻

荔支者閩廣巴蜀之佳果也實號珍腴樹稱長壽色味不一品類繁滋虞夏商周旣不錫于禹貢曾何圖于王會豈非生絕徼者難以充君之庖耶自尉陀備物相如作賦以來貢盛于漢帝而交趾置候名傳于唐妃而涪州遣騎其後紅鹽白曬紛馳于趙宋矣明興一切報罷俾英



英仙品遠跡廟廊之中灼灼靈根偃息瘴蠻之  
地人固有之物亦宜然本峻年在孩提從先公  
總憲嶺南知食而不知味年在稚齒從先公左  
轄閩中知味而不知品今年逾知非每覽君謨  
子固之書輒動三山九漈之想萬曆乙未移貳  
閩離越明年時惟朱明屈節丹支離柯翠幄舒  
張見絳苞之錯落瓊瓢剖迸訝甘液之旁唐齒  
頰浮香眉宇競爽矣古今人啖之不足故歌詠  
之歌詠之不足故從而譜之於是宋蔡君謨開

关于前明徐興公抉奇于後色香味品悉爾無遺生植採製粲然大備使食者可執品以按圖閱者可披圖而索品矣自蔡公所傳名存于今十而三四徐生所增奇名異品十而六七將五百年間僅二譜焉摛藻固難考索未易其不然歟伊余不慧飽啖是宜客有談楊梅勝于荔支者又有談龍眼可稱伯仲者不慧初啖謂客言爲然遞嘗乃知耳食非真身歷爲信勒斯荔譜成一家言

荔支舊譜序

黃履康

自宋蔡君謨學士纂荔支譜牒迄今五百餘年  
閩品謚爲奇絕古今詞人往往注頰而侈譚之  
晉安徐興公先生更取蔡譜而廣之其摛撫富  
其蒐羅博其詞采陸離其人抗志青霞擷芳秣  
苑葢嫻於箋疏者余取而讀之覺流膾吻齒間  
涎津津不能收何必箕踞樹下啖三百顆也甬  
東屠田叔使君來爲吾閩農府丞稍爲考訂蔡  
徐通譜授梓焉余從使君署中手撈輕紅因戲

語使君閩故以此姬重此姬藉與公寸管殊沾  
沾而生氣黃郎且檄南宮御女呼十八娘來玉  
珮珊珊將母以十二峰之夢醺與公耶使君笑  
而領之余獨怪靈均以騷經杼鬱瑤華佳卉舉  
綴穎端荔支抑何寥寥耶葢南天獨擅造物者  
巧閔之以待千載剖抉譜而傳之皆吾閩後先  
諸君子也通譜行爲絳衣之裨官爲端明之蓋  
臣爲南部之勝事萬曆丁酉歲九月望日

荔支咏序

鍾惺

夫有絕世佳人於此吾生不得與之同其地接  
其人襲其蘭蕙之香餐其醇醪之味覩其冰雪  
之容雲霞之服有妙於言者舉其形神而寫之  
筆舌之間縹緲遠近如昔人所謂詩中畫者對  
之已如身至其地而接其人矣幸而又身至其  
地接其人并其人之香之味之容服皆得而領  
畧之則其言之妙遂可廢乎余以爲惟身至其  
地接其人者乃能妙於言而亦惟身至其地接  
其人者乃益知其言之妙而不能忘情於其言

也閩中荔支其香味容服所謂絕世佳人也予  
楚人生平向往之仙仙乎不勝藥珠羣玉之思  
今年以督學至閩當荔子纂纂之日適有延津  
之役不得乘果下馬攀條折枝采華茹實食不  
能過二三顆輒罷或戲予遙聞聲而相思日近  
前而不御而予竊自比阮嗣宗之好鄰女終無  
所私或深於好者也至於篇章題詠贈之以言  
則老學究之不暇爲風雅固矣憲長吾鄉杜仲  
實先生獨能以公餘之日爲七言律三十首紀

之夫誅物之妙無如少陵然律能爲五言而不  
必七言近時王元美能爲七言而不能至數首  
未有屬詞屯村巨麗精切如公者蓋舉荔子之  
香味容服遠體遠神一一傳之於詩如寫照然  
何者公蓋接其人故言之獨妙而予幸身至其  
地或始知其言之妙也異時公開府八閩彼南  
國佳人卽公故知而予持公詩他往蓋無歲不  
至其地無處不接其人乃知一騎紅塵崎嶇險  
遠劣得妃子一開口而色香精神已失之甚遠

者何其計之勞且拙也

紅雲社約

徐 勣

清異錄云劉鋹每年於荔支熟時設紅雲宴余  
恒想其風致吾閩荔子甲于嶺南巴蜀今歲雨  
暘時若荔子花頭甚繁樹梢結果纍纍欲紅自  
夏至以及中秋隨早晚有佳品今約諸君作食  
荔支會善啖者許入不喜食者請毋相溷先定  
勝地名品以告同志平遠臺法雲寺白密二樹  
異品也必先半月向主僧買其樹熟時往食本



宗上人主之西禪中冠甲于城內外馬恭敏賜  
葬之所極繁極美馬季聲主之尚榦滿林香香  
倍衆品唯林氏有三五樹非至親往求不得入  
城陳伯孺所居與林氏至近伯孺主之磨盤大  
如雞子高景倩東山別業有此種今歲生尤繁  
盛景倩主之鳳岡中冠爲福州第一品必至其  
地始得選食但路隔一水非舟楫莫至謝在杭  
土之勝畫出長樂六都更有一種雞引子亦出  
六都同時而出在杭長樂產也再主之綠玉齋

前新植一株楓亭種也今歲結實不甚多食畢  
足以他品余主之楓亭荔子名甲天下核小香  
濃一日一夜可達會城色香未變周喬卿莆人  
也主之桂林一種味極甘美凌晨皆於萬壽橋  
貨鬻間有挑入城者吳元化鄭孟麟主之會只  
七八人太多則語喧荔約二千顆太少則不飽  
會設清酒白飯茗及肴核數器而已不得沉  
湎濫觴混淆腸胃每會必覓清涼之地分題賦  
詩盡一日之遊願同志者守之萬曆戊申夏至

前十日徐勣與公題

紅雲續約

謝肇淛

余自壬辰離閩丙午始返十有五年未獲噉故園荔子每一思之常津津齒咽間也迨丁未夏無荔卽有一二僅慰足音未能果腹越歲戊申荔始大有年而社中諸子鱗次比集因思晉安此品甲於宇內幸而生長其地又幸而十七載始逢其熟也河清難俟髮且種種明年之馬首北矣可虛此日月乎於是社中諸子唱爲餐荔

會而不佞復條所未盡者如左以與同志者共  
守焉 一初入市則新香可愛勿嫌味酸勿憚  
價貴當集同志一噉以開勝會之端 一政滿  
市則光景難虛勿畏性熱勿憚會頻當連數日  
共噉以極行樂之致 一將罷市則殘紅可惜  
勿厭冷落勿憚搜尋當倒筐筥盡噉以成美事  
之終 一譜志記載甚多會城種類有限沿街  
擔負皆園林採拾之餘村落家藏多耳目罕見  
之種跬步所限終無染指之期一品未收已有

遺珠之歎凡我同志幸悉鄙懷或奇植異名傳  
乘弗載或家傳手蒔羔鴈所遺毋論遠近各採  
數顆以廣異聞兼闡幽鬱 一同志諸子嗜有  
濃淡性有豐約縱勉強破慳於一時終隱忍生  
嗔於他日乾餱失德雅道衰矣不佞之約主不  
必一人人不必皆備或餘勇可賈連司累日之  
盟或百足不僵共鳩一時之集憚煩而願去者  
聽慕風而來參者許要以行樂及時何用枉生  
哇噉亦恐風景少殺不無貽笑山林 一人皆

同心會主真率在家少加酒饌一二以佐笑談  
出外遊者唯携鉢茗數具以防饑渴蓋簡則携  
易坦則意洽用約則後會可繼品少則正位不  
分要爲側生賞音非作措大面孔也 一聚會  
旣數功課當嚴若徒稱雄善啖則忙隸皆可登  
壇縱使濡忍腐毫卽廝養亦嗤上水今置一簿  
携以自隨每會先記日月勝地次列同集姓名  
主人分體拈題坐客卽席抽思雖潤色或需他  
日而草初必限尅期詩不成者記姓名於簿以

行薄罰無恃頑化外致取笑筆端 一名園雅  
會樂事賞心雖形骸已盡蠲除而言語當忌穢  
雜或徵僻事或歌古詩誦人間未見之書談宇  
內瑰奇之事間有雅謔何妨絕倒勿言朝廷時  
政勿作市里猥談勿陰說短長勿互相攻擊勿  
故爲狂態亂恣喧呶勿強作解事妄加評品此  
雖一時萍蹤便是千古話柄無令惠州三百顆  
擅美當時更恐王家十八娘見笑地下耳萬曆  
戊申夏至前八日謝肇淛在杭誤

賦類

荔支賦

宋 范成大

紹興丙子夏有自行都餉貢餘新荔子者坐  
客稱歎窮山所未嘗有呼酒更酌鼓瑟以侑  
之且爲之賦時爲新安掾

吾聞南國之南水激而山蟠鍾具美於一物繁  
化工之所難擱絳綃以袪服襲菁桃而中單湛  
冰明之漣漣粲玉立之團團蓊生香之令芳泫  
仙液於微瀾走候置其萬里上玉宸與金鑾顧



人間之流落纔千倉之一簞餉江南之病客索  
孤笑於顰端斤蜂蜜之黃膩謝佛桑之紅乾覺  
龍目之么麼哈蒲萄之甘酸藉以秋雲之巾薦  
以水晶之盤羞以燒香之浮醅相以流水之清  
彈追風月之溫麗耿星河其未翻余一嚼而三  
嚙灑玉池之清寒恍醉夢之翺飛披九天之風  
翰望涪州與閩嶺揮八極於雷鼾方冥濛其路  
暗儵浩蕩其天寬爰芳臺與綉戶窈玉聲之闌  
珊款荔支之仙人若平生之所歡謂客子其少

留紛擘綠而破丹招玉環於東虛御清空之雙  
鸞訪長生之舊曲有千載之遺歎悵三山之回  
風驚南斗之闌干亂梧竹之滿庭渺雲海之漫  
漫

荔支賦

明 蔣德璟

若夫金櫻栗玉虎斑龍牙麝囊椰鍾黑葉綠紗  
蚶殼朱柿星毬鷄肝霞墩松蕾金線冰團牛心  
鵲卵淨瓶蜜丸夫固亞僕乎瀘粵然猶閩圃之  
下丹也逞者忠惠之書譴於方氏橋二百而爲

識竟淪掩於鐸里維鐸及夾誕降嘉莖延壽是  
孳祥井是沈移紫度緋法藍心恥流觀夫伏燭  
秋回百荔垂灑黛葆扈雲形實射暹夜星晝燭  
圓蓋方陣譬若火烽其木不燼又若琅玕萬斛  
鳳九離離芸風氣聞千步又若洛媛含辭未吐  
寒泉三尺滌浴天芳又若合德初出蘭湯廣上  
圓下皓肪中沒又若宜主柔溫無骨霧綃半劈  
醴津斯囀龍漿斯落又若吉雲露珠一勺昶膜  
醲英又若水晶頽核焦封又若丁香應啜灰滅

又若甜雪留芬射越弛服墜裾又若茵墀流汁  
入渠故其冬青春榮之性絳襦玉膚之狀駁犖  
辨艷之妝蠲渴補髓之湏亮羣族之所伏嗟難  
得而覩況是以釵頭盛鬋雙髻奉禍王娘鄣袂  
將軍雖蠲服其實者挹膏漱瓢爲荔羨偃昔扶  
荔之宮積草之池金明搖風十不一易若乃雒  
陽置於嶺南長安盡於巴蜀法部初哇明駝暗  
翻撫酸苞而虛憐悵珠靨之已禿悵嬌環之解  
笑固以城功爲結琫忠惠之書撓二產汰閩江

之陂鵝未若茲種羃歷乎三十二之外重曰震  
氣五滋狎獵的纏生代巧兮蒼選蚌胎誰其冠  
者繁延壽兮元鼎風埃宣和航瓦珍非質兮皇  
罕連寶願登上林比禹橘兮

荔支酒賦

何偉然

東粵韓若海師相掌南翰苑時讌士於院之  
桂樹下樽罍迭舉醞酎遞易最後出荔支酒  
充季雅冰壺玉液通座神澄客曰盍賦諸僕  
屬座未得分婪尾之卮遂抽毫受繭以應命

翳美祿之在醞類樹秫以釀成何醑毋之殊異  
取離支於南珍詎頓遜之酒樹寧六齊於趨生  
擷宋香與陳紫策火攻而淬晶浮玉竿以無色  
考水德而鑑澄虞香味之速遷計載魄而抱真  
辰溪以釣藤爲就寶州以醉果作珍伽盧有椰  
子之汁南蠻有檳榔之醇訶陵柳花之扶南安  
石榴之精造蒲萄於八色洗梨妝於三春彼皆  
以醞而勝醪此獨漉髓而沃神碧瑤瑩於仙女  
河源探夫崑崙及紅友爲玉友悉中聖而爲清

瑞露則書生之特遇瓊胎則南嶽之所迎王忱  
何言夫上頓次道奚得於盡傾玄旨將合於石  
汁幽馥一出於蘭英珠璣呈月而流液琬琰作  
膏而未凝覺金暉之太黃延壽光而永存可扶  
衰以維老蓋補髓而渴蠲飲長生於君山斟洪  
梁而色欣誣麻姑之見遺實侍郎之貽樽鄙醞  
醪之翠濤何蒼梧而漂青令牙慧而齒智寧舌  
妙而脣馨經神池而薦馥何鷄舌之比能矧和  
平之合德膽不豚而避醒出鷄鶩之上卮覺萍

勝而弗沉分桂香于木天將金粟之遜芬洵太平之良讌一和神而定人詎藜藿之浴腸得借滋于上林洵元宰之下士起獨坐之華歆皆如斯之妙飲亦觀禮之所生何必殛儀而放杜囚星而楚經也哉

荔支賦

林古度

吾閩佳果有荔支焉歷代稱美百莫能先產旣炎土生復炎天爲樹嘉蔭爲花細妍及其成實外赤中鮮纍纍若若紅香滿前其品固貴其質



可憐衆彼名號後人強鑄雜沓瑣屑荔不必然  
荔之爲物別有自全勿剪勿伐匪原匪田厥根  
厥本亦風亦烟不知唐室取媚嬖媚致勞驛騎  
反以爲愆非荔之過由人所牽君子終諒不倚  
不偏旣充甘食亦奉華筵一切種類畢莫能賢  
雖足珍兮未敢自專世所尚兮桃棗成仙爾表  
爾裏色味相兼粵酸蜀澁鼎足殊懸三都見侈  
萬古難捐漢王唐張兩賦爭傳子曷能贊億萬  
斯年

頌類

荔支綠頌爲王公權作 宋 黃庭堅

王牆東之美酒得妙用於六物三危露以爲味  
荔支綠以爲色哀白頭而投裔每傾家以繼酌  
忘魑魅之躩躅見醉鄉之城郭楊大夫之拓落  
陶徵君之寂寞惜此士之殊時常生塵於尊勺

荔支頌

明 韓上桂

果之美者曰荔支余友鄧道協所著通譜詳  
矣往時閩粵各矜其勝余謂茲果何必余兩

鄉卽瀘戎間固儼然稱南面孤也因憶白香山所評語而爲之頌頌曰

歷稽羣植疇據奇觀果推香荔花侈牡丹或憎炎熱或苦凝寒弗易厥性惟土是安牡丹新聞荔亦晚出風雅罕傳騷篇恨逸迨漢迄唐二物吐色丹賞其葩荔珍其實余長荒嶠未審姚黃撫斯玩斯特嗜瓊漿花僅屑玉果乃稱王星羅霞布蓋擁幃張入掌珠瑩清牙雪釋乍嚼怡神飽餐資液香味兼妍姿顏最惜櫛比駢聯充盤

映席種先南海次數增城龍牙犀角瓊瑋咸矜  
遙聞陳紫閩福尤名一經妃笑瀘產爲輕扶荔  
官崇側生賦重吾鄉九齡雄詞競諷亦有君謨  
譜分伯仲道協後興搜羅靡縱旣操令品載省  
豪奴將離旁挺後勁寧孤天然作對白老匪誣  
置華旌寶猗歟盛且

荔支頌

龔之祥

世珍鮮荔曰色味香五日盡去遠曷能詳頰虬  
卵解白鳳膏結裝車與船奚聞芳澤爰考載籍

遡厥本始時損其膚未隕其美二紀而實功成  
合抱冬夏青青松栢之操火德離明蟲不敢近  
待人而採薑桂之性熟私其鄉根不踰域含章  
可貞匪枳其橘選樹而飽亦得美蔭清和宜人  
蕉風竹韻旨口固爾比江瑤柱想格之高豈惟  
甘故饑者所嗜蝻蟀斫雪詎知微酸偏滋禪悅  
瀘戎下品猶津女妃矧伊烏石殊族呈奇嬖施  
之慕能不企而凡可以食鮮可以酒綠兮流液  
紅乎吾友誰其致之酌以大斗

與雍丞黃海鶴先生書

鄧慶霖

蔡譜中家寥無紀及諸刻本皆作寂寥無紀考其文意列品雖高而家寥無紀以其無紀事之家耳况金石之刻必不差譌郭聖僕亦主此說惟長者示之唐鄭谷荔支樹詩孤棹今來巴檄外興公亦作檄字鄙意巴檄非是或微字譌耳鄴架上不少鄭都官集幸考之陳履吉以荔子原出巴蜀移植吾閩今閩盛而蜀微譬之氏族分處裔衍於原處理或有之此可以說鄭詩矣

王十朋詩云路遠應難三日寄下註云閩中荔  
支三日到永嘉王元直云福寧州諸海壩皆植  
荔支揚颿三日可到溫州宋梁克家三山志謂  
福州之北自長溪寧德羅源連江西自古田閩  
清皆不植荔子古田閩清地不宜也若連江寧  
德長溪何地弗產梁公溫陵人尚不識福州北  
境况其遠者哉

復道協

黃居中

家家無紀當依石刻爲正鄭都官詩已檄句查

雲臺稿果是微字門下訂謫不虛也王梅溪是  
敝郡守寄永嘉似難三日或附海舶可通耳

與黃海翁

鄧慶霖

徐譜啖食中云帶露摘下浸以冷泉此欺人語  
耳荔支浸泉以擔頭甯者行烈日中啖之却用  
泉浸若乘曉入林帶露摘下則又何用泉浸哉  
興公定未乘曉入林耳吳門葛震甫謂食多發  
熱泥興公乘曉浸泉一語震甫爲閩司理時八  
月終到未食荔子止王元直留龍眼啖之此皆



未知真者

復道協

黃居中

新荔浸水在日中時非帶露摘下時也不浸食  
多發熱理或有之野種卽蔡譜所謂椰鍾其聲  
之譌也其大若椰子耳其名顧不典乎

與黃海翁

鄧慶宗

徐譜謂常選鮮紅者於竹林中擇巨竹盤開一  
竅置荔子節中仍以竹籜裹泥固封其隙藉竹  
生氣滋潤可藏之冬春色香不變此語頗異閩

中不乏好事未嘗見有鮮果至春時也記得阮  
堅之司理閩日令人以棕包郡庭荔子至冬開  
視則已枯落作臭夫物至熟時則已蒂落安得  
久視况此至貴之物能以人力奪之耶徐譜欲  
神其說更啓後世之惑元直以貴郡野種卽爲  
勝畫長者當爲野種品題視狀元香何如也韓  
宗伯以蔡端明立意故亞嶺南不知此意非始  
于端明先具於本草大抵人各負其鄉土端明  
獨奇楓亭宗伯自陳嶺海皆不若王奉常敬美

先生以長樂勝畫爲第一奉常吳人其言公其  
論定長者勿以三山與吳航同隸福州而諄諄  
勝畫也果如元直之說則泉有野種便可頽頽  
楓亭第不如福州名之十倍典雅耳

復道協

黃居中

徐興公云云固是文人好奇之過然聞之建州  
蓮子實獨大亦以夏月包裹蓮房至冬開之不  
壞而敝郡狀元紅不火烘而日曬肉不甚黑味  
亦不變興公未可盡非姑存以俟知者勝畫僕

未及啖野種皮麤肉厚而香特勝然食之有渣  
固當在狀元香下又敝地桂林鄉有桂林卽野  
種別名惟殼有一線略異甘美似勝野種也野  
種桂林間有小核者勝畫亦復如是耶又山支  
有綠羅袍者俗名青約其皮綠肉潤而漿無水  
鮮脆甘美應班狀元紅上但出少難得卽十八  
娘敝鄉僅一株今不知存否若何矣泉郡荔支  
以南安錦田爲上傳錦泉會元故里也其家園  
有數百株稱最勝興化志稱火山黃巷者佳物

固以地靈耶

與曾大雲司馬

鄧慶宗

日來無事取荔支舊譜正其紕繆參以所見吳  
淳太從史授梓然此物惟閩人知之他處耳食  
者知之未真輒以楊梅謬爲甲乙又以吾閩未  
食嘉楊梅臧晉叔言吳興太子灣產白楊梅其  
妙無可倫比卽如晉叔所云亦安能敵我荔支  
哉韓若海宗伯言君謨譜荔支伸閩而抑粵又  
欲爲粵吐氣此一物何至爭辯乃爾也君謨譜

中獨遺長樂之勝畫而左袒楓亭之狀元香特甚王敬美亦云嶺南爲下而勝畫獨甲諸種是爲得之也友人以溫陵之野種卽勝畫之別名第恨其名不典耳明公視野種於諸品何如也

與宋比玉

僕見蔡端明公荔支譜諸石刻家寥無紀句校之諸書皆作寂寥無紀林茂之謂寂字爲家字不全也海鶴先生與郭聖僕以家字不差語意爲列品雖高紀事之家却寥寥耳又十八娘其

冢今在城東報國院冢旁猶有此樹二冢字皆  
作家字又粉紅條故曰粉紅石本故曰語止下  
無粉紅二字若以梨棗之刻不如金石虎皮條  
主吏作生吏和帝帝字又闕則此三家字差譌  
無疑也後世翻刻數十手豈無一人作端明忠  
臣而縱其差譌如此惟王元直以冢字旁點故  
意放於綿頭之上以取態立異果爾不慮作家  
字讀耶元直以古人碑銘若兩字並排則一字  
別構寫法今和帝第二行有魏文帝語二帝相

並故省其一果爾何不省魏帝而省漢帝也元直又以粉紅故曰卽止爲文章之妙若再粉紅二字則複矣粉紅二字皆後人蛇足又以調於民生句以吏常以牛心爲準與第六條主吏不同上言郡守下言掾史荔支皆調於民生如今各錢糧皆派在丁口元直尊信金石大過僕甚惑之聞貴家有石刻且足下博識金石必有灼見

復道協

宋珏



知留心考訂敬服敬服家作寂冢作家所謂闕  
疑可也故曰卽止舊本皆然若以點置綿上以  
取態此說謬矣弟有荔支譜宋榻者爲小壻携  
去在此木刻耳

與鄧道協

王繼皋

見王敬美荔支敘蔡伯華大殺風景古人固有  
不喜孟子與離騷者伯華固不足異也記維揚  
有朱存禮居閩日馬于堦餉荔支數百顆只嘗  
其一而返之或問其故吾以于堦故一嘗耳荔

支不足嗜也五穀本以養人有學辟穀者卽吾  
閩亦有伸龍目於荔子之上徐惟和譬之曰正  
人君子常有不宜流俗處時以爲善譽五嶽集  
何處索觀

與鄧道協

徐 勣

足下謂僕藏生荔支於巨竹中神其說啓後世  
之惑此非僕之臆說也三山元宵最盛而神廟  
中各出奇珍生荔留至春時往往目擊之家兄  
元夕詞有云閩山廟裏賽靈神水陸珍羞滿案

陳最愛鮮紅盤上果荔枝如錦色猶新此一證也豈愚兄弟初爲是說啓後世之惑者耶足下居與閩山最近試詢之鄉長老則知吾言之不誣矣到金陵便以語黃明立先生僕亦非好奇之過耳

閩中荔支通譜卷十二

溫陵黃居中明立訂

綏城吳師古啓信校

明鄧道協荔支譜四

宋元詩

興化軍曹殿丞荔支

宋 蔡襄

厚葉纖枝新絳囊使君分寄驛人忙  
彩毫封處曾留意筠籠開時不減香  
風色甚豪應少損路程差近得分嘗  
閩州縱有千千樹未抵家園氣

荔枝通譜卷之十一  
味長

和曹殿丞寄荔枝

荔子凝丹摘曉鮮江南來路與雲連託根曾是  
三山下結實應歸萬木先鄉國遠携甘旨重宴  
堂分翫色香全清才仍更傳新唱一一驪珠照  
眼圓

謝宋評事荔枝

有引

伏蒙評事宋文分貺家園丹荔世傳此樹已  
三百年黃巢兵過欲伐之時王氏主其樹媿

擁樹願并戮巢兵爲之不伐今雖老矣實益  
滋繁味益甘滑真佳樹也因成短章用酬厚  
意

齋館從容接燕申每臨佳樹走觥巡兵鋒却後  
知神物年壽高來况主人並賞昔聞思故友分  
甘今喜奉慈親豈惟特祝公難老兼欲靈株比  
大椿

七月二十四日食荔支

絳衣仙子過中元別葉空枝去不還應是天人

知憶念再生朱實慰衰顏

和龐公謝子魚荔支

霜鱗分不登枯肆丹實全應勝木奴欲効野芹  
羞獻去敢期佳什墜驪珠

淨衆院嘗荔支

霞樹珠林暑後新直疑天意別留春京華百世  
爭鮮貴自是芳根着海濱

毛君惠荔支

蘇轍

荔子生紅無奈遠陳家曬白到猶難雖無驛騎

紅塵起尚得佳人一笑歡

謝任瀘州師中寄荔支

文同

有客來山中云附瀘南信開門得君書歡喜失  
鄙吝筠簍包荔子四角具封印童稚瞥聞之羣  
來立如陣競言此佳果生眼不識認相煎求拆  
觀顆顆紅且潤衆手攫之去爭奪遡追趁貪多  
乃爲得廉耻曾不醕喧鬧俄頃間咀嚼一時盡  
空餘皮與核狼籍入煨燼

和張推官荔支



長嗟珍果滯遐方，好種華林奉帝王。  
夏簟滿風羅秀色，曉梯乘露摘新香。  
潑霞乍染愁將變，烹玉纔凝忍更嘗。  
正在臨邛病消甚，忽蒙佳惠敢相忘。

廖致平送綠荔枝爲戎州第一王公權荔枝  
綠酒亦爲戎州第一黃庭堅

王公權荔枝綠廖致平家綠荔枝試傾一杯  
重碧色快剝千顆輕紅肌撥醅蒲萄未足數堆  
盤馬乳不同時誰能同此勝絕味惟有老杜東

樓詩

杜子美宴戎州東樓詩云  
重碧拈春酒輕紅劈荔支

○次韻任道食荔支有感三首

一錢不直程衛尉萬事稱好司馬公○白髮永無  
懷橘○六年怙悵荔支紅○

今年荔子熟南風莫愁留滯太史公○五月照江  
鴨頭綠○六月連山柘枝紅○

舞女荔支熟雖晚臨江照影自惱公○天與蹙羅  
裝寶髻更按猩血染殷紅○

荔子

二首其一  
見前譜

曾幾

裳紅錦包三色露珠凍寒泚火傘燒林不成水  
北人藏冰天奪之却與南人消暑氣

憶荔支

唐 魚玄機

傳聞象郡隔南荒絳實豐肌不可忘近有青衣  
連楚水素漿還得類瓊漿

詠提刑邢夢臣度支連理荔支

宋 趙抃

嘉陽天遠被薰風荔子呈祥郡館中庇本莫將  
慈竹較媚時寧與瑞蓮同並柯晝聳煙光動異  
幹宵空月影通奇木幸逢真賞筆誰誇丹實一

一簇冰蠶繭千苞火鳳冠  
隔瓢銀葉嫩透膜玉  
漿寒

荔支歌

楊萬里

粵犬吠雪非差事  
粵人語冰夏蟲似北人冰雪  
作生涯冰雪一窖活人家  
帝城六月日卓午市  
人如炊汗如雨賣冰一聲隔水來  
行人未喫心  
眼開甘露甜雪如壓蔗  
年年窖子南山下  
去年藏冰試工夫  
山鬼失守嬉西湖  
北風一夜動地  
惡盡吹北冰作南雹  
飛來嶺外荔支梢  
絳衣朱

裳紅錦包三色露珠凍寒泚火傘燒林不成水  
北人藏冰天奪之却與南人消暑氣

憶荔支

唐 魚玄機

傳聞象郡隔南荒絳實豐肌不可忘近有青衣  
連楚水素漿還得類瓊漿

詠提刑邢夢臣度支連理荔支

宋 趙抃

嘉陽天遠被薰風荔子呈祥郡館中庇本莫將  
慈竹較媚時寧與瑞蓮同並柯晝聳煙光動異  
幹霄空月影通奇木幸逢真賞筆誰誇丹實一

庭紅

妃子園

宋 范成大

涪陵荔子天寶所貢去州里許有此園然峽  
中荔子不及閩中遠甚陳紫又閩中之最也  
露葉風枝驛騎傳華清天上一嫣然當時若識  
陳家紫何處蠻村更有園

新荔支四絕

荔浦園林瘴霧中戎州沽酒擘輕紅五年食指  
無沾處何意相逢萬壑東

海北天西兩鬢蓬  
閩山猶欠一枝筇  
艤船荔子如新摘  
行脚何須更雪峯

甘露凝成一顆冰  
露穠冰厚更芳馨  
夜涼將到星河下  
擬共嫦娥闔月明

趙舶飛來不作難  
紅塵一騎笑長安  
孫郎皴玉無消息  
先破潘郎玳瑁盤

四明海舟自福唐來

順風三數日至  
得荔子色香都未減  
大勝戎

涪間所產  
莆陽孫使君許寄  
蜜荔過期不至

貳車潘進奏  
餉玳瑁一種亦佳  
併賦之

荔支謠

陳襄

番禺地僻嵐煙鎖萬樹纍纍產嘉果漢宮墜落  
金莖露秦城散起驪山火炎炎六月朱明天映  
日僊枝紅欲燃自古清芬不能遏留得嘉名爲  
樅仙上皇西去楊妃死巒海迢迢千萬里華清  
宮闕間無人南來不見紅塵起至今榮植遍閩  
州離離朱實繁星稠一日爲君空變色千里憑  
誰速置郵可憐錦幄神仙侶爲飲凝漿滌煩暑  
綺筵不惜十千錢酩酊秦樓桂花醕秦樓女子



繡羅裳鳳簫鳴咽流宮商醉歌一曲荔支香席  
上少年皆斷腸

和程大卿荔支

棠陰爲政有光晶號令風行鬼亦驚和氣發來  
藏不得直教丹荔背時生

禁苑荔支結實賜燕帥王安中

宋徽宗皇帝

葆和殿下荔支丹文武衣冠被百蠻思與近臣  
同此味紅塵飛鞚過燕山

含露迎風惜不嘗故將赤日損容光紅消白瘦  
香猶在想見當年十八娘

和程大夫荔支

唐庚

家在岷峨飽荔支十年遊宦但神馳側生流論  
今千載入貢稱珍彼一時定自不將凡果比如  
何偏與瘴烟宜白頭莫作江南客辜負山中故  
友期

趙敬賢送荔支

戴復古

荔子固多種色香俱不同新來嘗小綠又勝擘

輕紅大嚼思千樹分甘僅一籠嘗觀蔡公譜夢  
想到莆中

故園秋日曲

謝翱

空園久閉無人住城烏應入巢其樹食盡滿園  
綠荔支引雛飛去人始知

荔支鸚鵡

魏時敏

摘鮮自涪州驛騎紛馳逐千載馬鬼鬼化作雙  
鸚鵡

錢塘荔圃

明陳憲章

錢塘四月尾荔子五番丹不異炎方戲無因  
聖主看微風香井落細雨壓梅蘭蔡老應憐汝  
名家譜可刊

求荔支栽貞節堂

高榜近東溟朝光滿北楹欲便清晝睡須待綠  
陰橫名木從誰假幽居賴母成君家多黑葉火  
急送雙莖

荅西良荔支

殷夜春雷憎攪睡灑牕涼雨苦催詩三年得句

無僧島昨日逢人說李逢  
殘內須耽長醉酒世  
間胡有不爭棋短歌歌罷無人聽持向西  
艮苔  
荔支

乞荔支

逢春思種樹  
垂老咲開齋  
未厭青紅在從君乞  
荔栽

荔支灣

古濠世階

五月炎州荔子圓  
珊瑚爲樹錦爲丸  
乍擬電掣  
龍精出宛似霞明鶴頂丹  
曾得漢皇陪上苑却

從唐騎入長安  
粵東朱實真無比  
蒲摘瓊枝荐

玉盤

辭類

南鄉子

雙荔支

宋 蘇軾

天與化工知。賜得衣裳總是緋。每向華堂深處見。憐伊兩箇心腸。一片兒。自小便相隨。綺席歌筵不暫離。苦恨人人分折破。東西。怎得成雙似舊時。

減字木蘭花

荔支

閩溪珍獻過海雲。帆來似箭。玉座金盤不貢奇葩。葩四百年。輕紅釀白雅。稱佳人纖手擘骨細。

肌香恰似當年十八娘

西江月

荔支

康伯可

多與牡丹聯譜南珍獨比江搖闕山入貢冠前  
朝露葉風枝裊裊香玉滿包仙液縐紅圓蹙鮫  
綃華清宮殿蜀山遙一騎紅塵失笑

滿庭芳

荔支

柳耆卿

青幄高張瓊枝綴巧萬顆香染紅殷絳羅衣潤  
疑是火然山白玉釵頭試簪黃金帶奇巧工鑽  
題評處仙家異種分付在人間 年年輪帝里



歡呼內監妝點金盤况曾得真妃笑臉頻看  
領當時奏曲風流命樂府名傳憑誰道移歸禁  
苑長使近天顏

宋介夫遺荔百顆并蔡公墨跡用蔡韻

元 盧 琦

病客愁懷鬱未申窮簷盡日幾迴巡多情故舊  
偏憐我一種甘香最可人宋祖聲名傳耳底蔡  
公墨跡喜躬親千年佳樹蟠根在莫怪莊周說  
古椿

咏宋家荔支

林士敏

江南有佳植託根在庭除扶持王母力珍重端

明書君家忠孝門餘澤尚沾濡子孫貴封植慎  
勿忘厥初

出端明別紀補

明詩一

世宗皇帝御製荔支詩

荔支佳果產南方何事名爲十八娘露濕嫩柯  
青玉色日蒸奇實紫綃光纍纍葉底垂珠顆箇  
箇囊中蘊玉漿驛馬星馳來貢獻明皇賜與貴  
妃嘗

海雲蒸暖荔支香顆顆中包白玉漿萬里固應

修職貢君王只恐擾遐方

謝蜀王賜荔支

方孝孺

涪州丹荔擅時稱翠筐來庭色尚新獻罷未曾  
登玉案先教頒賜與羣臣

翠籠擎出殿門東受賜羣臣喜色同却笑開元  
恩未廣祇將異味悅深宮

尚食頻供素膳回金壺仙醒不曾開君王暗道  
渾忘味佳果何勞遠貢來

無才慚曳殿門裾殊味頻嘗玉饌餘解道側生

風味好惜非梁苑馬相如

九重勤儉恤民勞錫貢深思道路遙異味奇珍  
俱詔罷皇明家法勝前朝

病身趨召歷千山又見江城荔子丹竊食無功  
心有愧賜歸分與衆人看

園官愛果勝黃金一樹生成一樹心味美已知  
堪適口當恩倍值用功深

練帶荔支

高 啓

春雨蠶枝錦果肥華清貢罷驛塵稀山禽自繞

枝頭啄疑是宮中舊雪衣

咏荔支

王恭

憶昔開元日繁華御裏看玉環天上去無復到  
長安香沁瓊漿冷紅垂火齊團九重思玉食馳  
貢未來難

賦得荔支送人之燕

昔年高品滿長安薊北空聞火齊團雨帶花  
飄別路瘴雲和葉拂征鞍離盃醉擘丹砂頰纖  
手嬌傳碧玉盤明發幽州千里外竹籠遙寄也

應難

靈源寺石橋上擘荔支鄭輕紅于流水有

咏

高棟

三笑溪頭擘荔紅空波亂點紫霞峰祇疑洞口  
桃花去流出靈源第幾重

山禽荔支

一枝紺雪帶炎風青鳥飛來夕照紅南國只今  
無歲貢莫教銜入上陽宮

荔支

陳輝

南州六月荔垂丹萬顆累累簇更團絳雪艷浮  
紅錦爛玉壺光瑩水晶寒高名已許傳新曲芳  
味曾經薦大官烏府日長霜署靜幾株斜覆石  
欄干

鳳岡荔錦

萬韞輝

鳳岡佳樹鬱葱龍海日晴蒸荔子紅曉色平分  
霞作嶂香風初動錦成叢嘉名不獨傳千載珍  
味應須貢九重憶昔嶺南遊宦日故人分送滿  
筠籠



鳳岡荔錦

陳价

千株荔子植前岡五月欣看錦作行翠幄幾重  
添暮雨絳霞一片絢朝陽冰盤試薦驚心喜雪  
顆初嘗澱齒香清世更無妃子笑紅塵一騎不  
須忙

荔支

薛章憲

荔支遠方之珍也近出海虞顧氏石田翁有  
作要余和之以寄主人

廷橘淮可食閩荔吳得栽地力費旋幹天巧煩

穿裁入耳卽欣然撫掌何快哉美合賦曲江怪  
宜志齊諧東海度朔桃西岡大梁梅休文始有  
疑辟疆初無垂疾足走蹠蹢遠自勞紆迴妄意  
祇應謬旣覲元非詒瓊枝細裊娜黛葉紛葳蕤  
手足喜斯猶心目豁然開郵傳衆愕眙聚觀互  
驚歎函盛願致子耄耋期生荏歲得十萬顆日  
啗三百枚仙襦感羅縠甘漿嚼瓊玖禮接比嘉  
賓保護如嬰孩丹櫻眩朱脣紅梨映頰腮遠望  
勾若榴曼倩遺叱來分畦列馬日闢壤規鹿胎

錢鏐時自操壺觴與之偕魚鳥來相親蜂蝶亦  
可媒百年會有終萬劫從飛灰

荔子

廖世昭

明珠十里越江濱此物真看席上珍潤啜冰霜  
堪夏正餘甘風韻稱時新葡萄香水難爭長盧  
橘楊梅恐後塵包貢自來王國典隱憂愁絕杜  
陵人

炎方佳實訝勻圓翠蓋雲枝亦可憐益智朱囊  
看雋永駐顏丹井有神仙側生應出推閩地害

馬從聞恨蜀天本草按圖知食性漫評真譜到  
吟邊

荔支

顧承芳

南海仙姨着絳紗玉肌瓊液襯丹霞清標絕色  
真憐汝盧橘枇杷未足誇萬顆慰奇先薦寢八  
閩迢遞此移家食茶茹藥空愁苦此日嘗新思  
轉賒

累累萬樹簇春紗灼灼千秋醉晚霞膚與截肪  
差可擬甘於萍實更須誇芹枕漫爾何由貢海

物酣來此是家耿耿丹心徒自切天涯芳草望  
應賒

荔支山鳥

陳昌

茜紅衫子玉肌香南國風流十八娘若得青禽  
傳信早不教鞦鼓動漁陽

荔支

釋德珉

滿薦金盤血色新枝枝猶帶瘴鄉春阿環只解  
聞新調不道漁陽有戰塵

荔支

顧可久

珠崖大火候荔子熟離離腫殼如丹罽凝膚似  
素脂甘流紫渠盃色映碧玻匙若擬吳中敵楊  
梅還卻枝

荔支

黃瓚

平林果熟綯情霞香散微風落日斜曾記當年  
傷六駿嶺南多種荔支花

荔支

岳正

水蒼火齊逗精光一道平溪兩岸芳競富石家  
紅錦障脂碁康樂紫羅囊摘來硯礪砂初結嚼

能冷灑露已霜却念天庖供御府孤臣無路薦  
甘香

郡齋荔支

葉溥

磊落枝頭結異芳水晶爲質錦爲囊八閩不到  
三郎騎千載如今味獨長

荔支

文元發

萬里紅塵一騎忙猶嫌香色漸輕黃自從遺襪  
傳觀後却望盧戎是瘴鄉

荔支篇

丁應宗

荔支樹植何年幹參百尺根盤旋虬枝密葉蔽  
雲日陰森嘉蔭冰廳前三月着花五月實垂垂  
兩樹紅霞聯清香風遞滿几席未嘗越客先流  
涎筐籠摘罷露猶濕雕盤疊進餘三千剝來纖  
手擬鵲卵金匙玉盃浮寒泉炎方性熱宜少啖  
我今一啖沉疴痊脆較駝酥甘較蜜殊方珍果  
應居先太真奚祗惜一笑自幸一飽緣前緣只  
嘗此品樂亦足莫嘆薄宦居閩天

咏荔支

錢行道



泥露蒸雲樹樹丹摘連枝葉滿銀盤從教辟穀  
消長夏千顆驪珠一日食

香溫水潤玉無瑕翠羽紅綃開麗華服食自令  
顏色好何須九轉煉丹砂

益卿貽生荔支

陸君弼

錦苞初擘露華盈顆顆金盆照水晶白髮年來  
多病渴不煩天上望金莖

荔支

鄭繼銘

遶屋荔支未熟淡紅淺綠交香莫論楊梅伯仲

濃陰苦箇爭長

長樂勝畫荔支歌

鄭世威

勝畫名果何處來六都殊品閭中希總是地靈  
大英特儲精生色偏絕奇豈知今日饋送廣翻  
使肥甘作苦悲春汎此離勞草草旱疫爲災百  
枯槁寃哉祟物獨榮華轉輸官府承奉好晨炊  
無米吏拍門東催西討送司道劄勦戎馬漏孔  
多涓流不塞成江河甯兒供應已云極設復濫  
觴無已將若何司道堂高隔千里那得懸知民

痛疴民痛疴多餓殍側望循良少舒嘯常德之  
龍東莞何卹青賑飢恒悄悄鎮守需採屢空回  
閭落晏如無勾擾嗚呼安得賢牧長若渠坐令  
凋効皆歡娛白叟只今稱卓魯何如一騎笑須  
臾君不見滇中石廣南珠何時滅天壤俱作俑  
者誰千古萬古長嘆吁

寄福州趙明經賦得生荔支 王叔承

生荔支憶君別我江頭時江帆五月下泉福遊  
子歸來荔支熟芳嬌十八娘秀吐江家綠一夜

山腰紅雨懸萬朶胭脂裹鮮玉玉漿入口甘露  
寒紫衣狼籍黃金盤山家女兒茉莉鬟日將荔  
支當飯餐樹頭之鮮樹底薦娟娟色味移時變  
怪得西飛馬上珍暮入長安朝海甸五花驄馬  
昭陽宮貴妃纖指閒輕紅嫣然一笑傾芙蓉人  
間百果朱顏色九霄翠幕生香風美人如玉如  
君子君隔閩南幾千里別來夢落九仙峯荔葉  
青青荔花紫螺江鯉魚忽寄將離愁細結蒼藤  
紙問君讀書近何如遮莫新篇報知己何時得

過滄海君飽喫荔支沉醉爾長相思生荔支

詠荔支

余翔

絳囊顆顆隱珠胎不是紅塵驛騎來自擘凝脂  
沉碧水大秦明月掌中迴

青籠携來荔子丹小姬剝出水精寒一餐已解  
文園渴不羨仙人承露盤

荔支十詠

陳省

吾鄉徐興公譜荔支僻壤果核一旦增珍老  
農談之頓興少陵美芹之感姑卽家園所有

者紀以十絕廁諸大方作後真似綴山枝於  
蜜丸諸品叢側也覽者知必攢眉擲之矣

海山

江南五月沼蓮馨已見家園荔子生首占山容  
涵海氣狀元藉汝作先聲

狀元紅

江南珍果滿芳叢品類纒纒自不同臭味清甘  
茲第一佳名因喚狀元紅

勝畫

鼎鼎朱實滿名園不數楓亭說狀元自此佳名  
稱勝化錯將勝畫入方言

桂林

靈根元自誇榕海嘉樹胡爲說桂林祇以味同  
金粟馥疑生月窟桂花陰

金鐘

金鐘名與桂林京差大於渠却讓馨記得鄉人  
傳諺語風吹落地不聞聲

中冠

陳平雖美如冠玉曾似冠中蘊玉漿  
薊北閩南千萬里美芹安得漢官嘗

蜜丸

朱殼圓圓九返丹味同玉液更堪餐  
花開不待遊蜂採結子成時卽蜜丸

鵲卵

烏鵲爲橋天畔遊盡留鵲卵綴枝頭  
年年七夕佳期近羅列如星樹上稠

雞引子



大如琥珀小如珠大小相連一蒂俱人世共傳  
雞引子維余還謂鳳將雛

山枝

山前山後側生丹似簇芙蓉秋水寒雖讓濃甜  
與諸品吾家滋味不嫌酸

荔枝

章嘉楨

側生當暑月風味壓南陬捧出盤頰玉簪來釵  
鳳頭葡萄寧汝伴盧橘若爲儔枝倚青樽畔還  
將作酒籌

翠幄千年樹紅鞋十八孃何論斑玳瑁不謂色  
硫黃入口易蠲渴爲圖難寫瓢披襟從飽食直  
得寓炎方

怪底膚如雪尤憐性怯寒盤飧野客供籠帶逐  
臣鞍錦陣霞舒紫瓊漿烏喙殘不因妃子笑焉  
得至長安

荔支

張鼎思

褰帷財見滿山花此日庭前萬顆賒鵲鳥熟啼  
遲曉月紫微交映晚晴霞有懷亭傳將難達訝

許兒僮摘競譁飽食五年中未熱且無書去報  
京華

到處娟娟映日紅綠榕相傍似青楓枝頭含露  
驅炎瘴籠裏生香入暗風玳瑁已堪誇嶺外葡  
萄那許說西戎歸時我欲携千子遮莫中州笑  
白公

荔支

任家相

嘉樹籠葱翠葢長炎天如簇蕊珠囊枝枝承露  
排朱實葉葉吟風襲異香已勝安期飡火棗疑

從玉女乞瓊漿含桃何物堪春薦好置郵傳達  
尚方

長夏濃陰午夢涼鳥啣仙子綻丹房絳綃暈帶  
胭脂濕碧液寒凝琥珀光謾把側生誇左賦曾  
隨飛騎入昭陽南中風物應無數占盡芬芳自  
品嘗

賦得雨中丹荔

張邦侗

輕紅艷艷復團團側出枝頭絳雪寒雨潤胭脂  
香不斷光沉琥珀露初溥浣花人去淋漓後擲

荔枝通記卷十二  
果車迴莽蕩開姹女鼎中丹幾轉飛瓊月下步  
珊珊

荔枝

徐渭

帆檣報荔枝猶憶江南時一色明勾漏千罌枕  
蜜脾消中隨蔗往高樹放猿之近日肝腸別依  
稀餓采薇

當醉更須醉當飡便買飡幾年千里外一顆百  
金難飛騎休輕刺垂猩且奪看老甜今已矣世  
味飽醎酸

虎眼白琉璃誰能隸虎皮小毬蜂粉結高液鳥  
羣司歸去茶如薺王歸膽亦飴由來甘苦柄舌  
觀豈能持

此首食虎眼  
荔支之作

畫扇頭花卉示宋比玉

程嘉燧

二十年前二十時風前雪後對花癡如今欲畫  
渾忘却恰似吳儂貌荔支

食荔支

商家梅

負却荔支三五年看人舌上說芳鮮今朝帶露  
新新摘不待楓亭飽一千

盛得盈盈食屢添笑余口腹太無厭迎風忽聽  
玻璃響消付如霜半七鹽

名爲勝畫名非常顆顆能含色味香猶有吳姬  
開笑口籠中先摘一枝嘗

閩中荔支通譜卷十二